

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN

**DARIPADA : YB DATO' KAMARUDIN BIN JAFFAR
[TUMPAT]**

TARIKH : 7 OGOS 2017

SOALAN : 20

YB Dato' Kamarudin Bin Jaffar [Tumpat] minta MENTERI KESIHATAN menyatakan usaha setakat ini untuk membantu para graduan perubatan yang menunggu penempatan 'housemanship' mereka, supaya dapat terus mengamalkan kemahiran sendiri, contohnya mengaturkan mereka dapat bekerja sebagai pembantu perubatan .

Tuan Yang Di Pertua,

Untuk makluman Ahli Yang Berhormat, seramai 3,387 graduan perubatan yang memperolehi pendaftaran sementara dari Majlis Perubatan Malaysia dan berdaftar serta lulus temuduga oleh SPA pada Januari hingga Mac 2017 telahpun diberi penempatan dan memulakan latihan siswazah secara berfasa. Fasa terakhir adalah pada 17 Julai 2017.

Berdasarkan rekod Suruhanjaya Perkhidmatan Awam baki calon-calon yang berdaftar dan belum dilantik selepas urusan temuduga pada bulan

Mac sehingga Jun 2017 adalah seramai 904 orang. Tawaran penempatan kepada pegawai yang telah melepassi tapisan akan dilaksanakan secara berfasa dan jangkaannya mulai September 2017.

Tuan Yang Dipertua,

Proses pelantikan Pegawai Perubatan Siswazah (PPS) adalah melalui Suruhanjaya Perkhidmatan Awam (SPA). Tindakan yang perlu diambil oleh graduan perubatan ialah:

- i. mendapat surat pertimbangan Pendaftaran Sementara dari Majlis Perubatan Malaysia (MPM).
- ii. memohon pelantikan sebagai Pegawai perubatan Gred UD41 kontrak melalui laman web SPA.
- iii. Calon yang memenuhi dan melepassi tapisan akan dipanggil ke sesi temuduga oleh SPA.
- iv. Senarai calon yang berjaya akan dimaklumkan SPA kepada KKM.
- v. KKM akan menawarkan penempatan kepada calon yang berjaya melalui Sistem e-housemen.

Selain daripada itu, dalam melaksanakan proses pengambilan ini, Kementerian dengan SPA telah menambahbaik prosedur pengambilan pegawai perubatan kontrak di mana senarai nama calon akan dikemukakan kepada pihak KKM untuk penempatan mengikut senarai turutan berdasarkan tarikh pegawai berdaftar dengan SPA secara atas talian setelah pegawai mendapat surat pertimbangan pendaftaran sementara daripada Majlis Perubatan Malaysia (MPM).

Tuan Yang di-Pertua,

Untuk makluman Ahli Yang Berhormat, Kementerian merancang untuk menempatkan graduan perubatan secara berfasa setiap dua bulan bagi menjalani latihan siswazah. Walau bagaimanapun, pelantikan penempatan mereka masih lagi tertakluk kepada kekosongan slot latihan siswazah di Hospital Latihan Siswazah.

Bagi melahirkan Pegawai Perubatan yang kompeten dan selamat, pelbagai usaha telah dilaksanakan. Bermula pada tahun 2008, tempoh latihan siswazah dilanjutkan selama 2 tahun. Selain itu, terdapat pertambahan bilangan posting alternatif bagi menampung keperluan latihan siswazah. Waktu bekerja fleksi diperkenalkan bagi Pegawai Latihan Siswazah. Kapasiti latihan siswazah adalah berdasarkan nisbah 1 Pegawai Perubatan Siswazah kepada 4 katil bagi memastikan mereka mendapat pendedahan mencukupi.

KKM juga sentiasa berusaha meningkatkan mutu latihan dan bilangan hospital yang menawarkan latihan siswazah. Pada masa ini, KKM mempunyai 46 buah Hospital Latihan Siswazah termasuk 3 Hospital Pengajar (HUSM, HUKM, PPUM) dengan kapasiti untuk melatih Pegawai Perubatan Siswazah sebanyak 5000 kemasukan setiap tahun.

Tuan Yang di-Pertua,

Bagi menangani isu peningkatan graduan perubatan, Kerajaan telah mengambil beberapa langkah strategik, antaranya adalah seperti berikut:

- i. Kementerian Kesihatan dengan kerjasama Kementerian Pengajian Tinggi telah melaksanakan moratorium bagi program perubatan dalam negara yang dikuatkuasakan bagi tempoh lima

- (5) tahun mulai 1 Mei 2011 hingga 30 April 2016 dan kemudiannya dilanjutkan lagi mulai 1 Mei 2016 sehingga 30 April 2021. Moratorium ini meliputi dua perkara iaitu tiada program perubatan yang baru di peringkat Ijazah Sarjana Muda dan tiada penambahan kuota pengambilan pelajar program perubatan. Bagi keluaran graduan luar Negara pula, ia adalah diluar bidang kuasa Kementerian Kesihatan;
- ii. menambah sebanyak 190 slot latihan lagi di tiga (3) buah hospital latihan siswazah iaitu Hospital Universiti Sains Malaysia, Pusat Perubatan Universiti Kebangsaan Malaysia dan Hospital Enche' Besar Hajah Khalsom, Kluang;
 - iii. merancang untuk menambah fasiliti latihan siswazah yang baharu, contohnya Hospital Shah Alam; dan
 - iv. meneruskan pengambilan Pegawai Perubatan Gred UD41 setiap dua (2) bulan sekali berdasarkan kekosongan slot latihan siswazah semasa.

Tuan Yang di-Pertua,

Kementerian Kesihatan Malaysia prihatin dengan para graduan perubatan yang perlu menunggu dalam jangka masa yang lama sebelum dilantik untuk menjalani latihan siswazah.

Sementara menunggu untuk menjalani latihan siswazah, para graduan perubatan digalakkan untuk membuat latihan sangkutan (attachment (dengan izin)) di mana-mana fasiliti perubatan samada kerajaan atau swasta.

Selain itu, Kementerian Kesihatan Malaysia juga bekerjasama dengan pihak organisasi bukan kerajaan seperti Malaysian Medical Association (dengan izin) bagi melaksanakan kursus pra latihan siswazah. Ini untuk membolehkan para graduan perubatan mendapat pendedahan serta membuat persiapan awal sebelum menjalani latihan siswazah.

Tuan Yang di-Pertua,

Untuk makluman Ahli Yang Berhormat, graduan Perubatan hendaklah menjalani latihan siswazah di hospital yang telah diakreditasi sebagai Hospital Latihan Siswazah oleh Lembaga Kelayakan Perubatan seperti mana yang dinyatakan di dalam Seksyen 13 (2) Akta Perubatan 1971. Setiap hospital sama ada hospital kerajaan atau swasta yang ingin dijadikan Hospital Latihan Siswazah perlulah dinilai oleh Lembaga Kelayakan Perubatan dari segi beberapa syarat seperti berikut:

- i. Mempunyai sekurang-kurangnya 6 disiplin asas iaitu Perubatan Am, Pediatrik, Pembedahan Am, Ortopedik, Obstetrik dan Ginekologi serta satu disiplin alternatif (sama ada Kecemasan, Psikiatri atau Anestesia).
- ii. Mempunyai sekurang-kurangnya 2 orang Pegawai Perubatan Pakar dan Pegawai Perubatan Residen (Medical Officer (dengan izin)) bagi setiap disiplin.
- iii. Mempunyai jumlah kes dan case-mix (dengan izin) yang mencukupi.
- iv. Mempunyai kemudahan yang mencukupi untuk membantu perjalanan Latihan Siswazah seperti perpustakaan, bilik auditorium dan kemudahan tempat tinggal.

Tuan Yang di-Pertua,

Bagi hospital swasta yang ingin menjalankan Latihan Siswazah, selain daripada syarat-syarat yang telah dinyatakan sebelum ini, mereka juga perlu bersiap sedia untuk membayar gaji Pegawai Perubatan Siswazah dan menanggung kos insurans *medical indemnity* (dengan izin) serta sebarang isu *medico-legal* (dengan izin). Pesakit-pesakit di hospital swasta juga perlu bersedia untuk memberi keizinan untuk diperiksa oleh Pegawai Perubatan Siswazah.

Bagi graduan perubatan yang ingin menjalankan latihan siswazah di luar negara, buat masa ini Majlis Perubatan Malaysia telah mengiktiraf latihan siswazah di 4 buah negara iaitu di Australia, New Zealand, United Kingdom dan Ireland. Graduan Perubatan yang telah menjalani latihan siswazah di 4 buah negara tersebut boleh diberikan Sijil Pendaftaran Penuh tertakluk kepada kelulusan Majlis Perubatan Malaysia.